

**INATSIARTUT  
OMBUDSMANDIATA  
UKIUMOORTUMIK  
NALUNAARUTAA  
2001**

## 28 - Akileraarutit akitsuusiussallu

**28 –1 Akileraartarnermut Siunnersuisoqatigiit suliamik suliaqarnerminni sivilisunaarsinerat. Akileraartarnermut Siunnersuisoqatigiit sulianik suliaqarnerannut malittarisassaqaarnissaq pillugu apeqquut.**

*Qinnutigisami, Akileraartarnermut Siunnersuisoqatigiinnut 8. september 1998-imi, 8. november 1999-imi aamma 26. november 1999-imi nassiunneqarsimasut, Akileraartarnermut Siunnersuisoqatigiinnit suli suliarineqarsimanninnerat A-p 11. oktober 2000-imi naammagittaalliuutigaa.*

*Ombudsmandip ajuusaarnartorujussuartut isigaa Akileraartarnermut Siunnersuisoqatigiit sulianik A-mut tunngasunik suliaqarnerminnut atatillugu ukiut marluk sinnerlugit atorsimammattigit.*

*Tulliullugu Ombudsmandip ajuusaarnarluinnartuusoraq Akileraartarnermut siunnersuisoqatigiit A suliat ingerlanneqarnerat pillugu pisariaqartunik nalunaarfigisarsimannimmassuk.*

*Kiisalu Ombudsmandip isornartorsiortariaqarsoraq Akileraartarnermut Siunnersuisoqatigiit sulianik suliaqarnerminnik ingerlatsinerat suli sivilisunaartuarsinnarmat.*

*Ombudsmandip Akileraartarnermut Siunnersuisoqatigiit aningaasanik akuersissuteqarfigineqarnissamik pisariaqartitsinerannik naliliinissamut Naalakkersuisut pisussaaffeqarnerannik isumaqarnini nalunaarutigisimasani<sup>1</sup> aalajangiusimavaa, taamatuttaarlu soorlu aamma, akuersissuteqarnissamut killissaritinneqartut iluanni, innuttaasut suliassanik pisariaqanngitsumik kinguarsaanertalimmik sullinneqannginnissaminnut inatsisitigut piumasaaqateqarsinnaanerannik mianerinnittumik tulleriissaarinnissaminnut Naalakkersuisut pisussaaffeqartut.*

*Ombudsmandip inassuteqaatigaa Akileraartarnermut Siunnersuisoqatigiit isumaliutersuutigissagaat Akileraartarnermut Siunnersuisoqatigiinni naammagittaalliuutinik suliarinninnermut malittarisassat atuuttut allanngortinnissaannut pissutissaqarsinnaanersoq. (J. nr. 11.28.-20.1/-092-00)*

A-p naammagittaalliuutaa 12. oktober 2000-imi tiguara. Ukiuni isertitaqarfiusuni 1994-imi, 1995-imi aamma 1997-imi isertitami amerlassusilerneqarnerannut atatillugu piffissaq Akileraartarnermut Siunnersuisoqatigiit suliamik suliarinninnermut atugaat A-p naammagittaalliuutigaa.

---

1. Ukiumut 1998-imut nalunaarut, suliaq 28-1



A-p Akileraartarnermut Siunnersuisoqatigiinnut qinnutigisai uannut naammagittaalliorneranut tunngaviusut Akileraartarnermut Siunnersuisoqatigiinnut 8. september 1998-imi, 8. november 1999-imi aamma 26. november 1999-imi nassiunneqarsimapput.

Naammagittaalliuut misissuineramik aallartitsinissamut tunngavigissalugu naammannersoq nalilliiniarninni atugassatut Akileraartarnermut Siunnersuisoqatigiit 2. november 2000-imi qinnuigaakka mappi allagaatinik A-mut tunngasunik imalik atukkiuteqqullugu.

Mappi allagaatinik A-mut tunngasunik imalik kiisalu Akileraartarnermut Siunnersuisoqatigiit oqaaseqaatigigallagaat 8. november 2000-imi ti guakka:

“... ”

Ombudsmandimut ilisimatitsissutitut oqaatigineqarsinnaavoq Akileraartarnermut Siunnersuisoqatigiinnut allattaagallartup oqaatigisimammagu amerlassusiliinerit naammagittaalliuutigineqartut Akileraartarnermut Siunnersuisoqatigiit 2001-imi apriilimi ataatsimiinneranni saqqummiunneqarnissaat naatsorsuutigineqartoq.

...” (Atorfeqarfimmi nutsigaavoq.)

Mappi allagaatinik A-mut tunngasunik imalik 8. december 2000-imi utertillugu nassiuppara, tamatumunngalu peqatigitillugu Akileraartarnermut Siunnersuisoqatigiit nalunaarfigalugit naammagittaalliuut aalajangersimasumik suliarilerniarlugu aalajangertunga.

Tamatumunnga peqatigitillugu Akileraartarnermut Siunnersuisoqatigiit oqaaseqaateqaqqullugit qinnuigaakka. Tulleriinneri malillugit 22. september 1998-ip aamma 18. januar 2000-ip kingornatigut Akileraartarnermut Siunnersuisoqatigiit suliamik suliarinninnerit suut ingerlassimaneraat pingaartumik paasissutissiissutigineqarnissaat kissaatigaara, tamannami suliamit ersinngimmat.

Akileraartarnermut Siunnersuisoqatigiit allakkatigut 11. januar 2001-imeersutigut nalunaarfigaanga

“... isertitanik amerlassusiliineq pillugu naammagittaalliuutinik Akileraartarnermut Siunnersuisoqatigiit allattoqarfianni suliarinninneq 2001-imi februaarimi aallartinneqassasoq naatsorsuutigineqartoq, Akileraartarnermut Siunnersuisoqatigiit 2001-imi apriilimi ataatsimiinneranni saqqummiunneqarnissaat siunertarlugu.” (Atorfeqarfimmi nutsigaavoq.)

Paasivara Akileraartarnermut siunnersuisoqatigiit A-mut allakkaminni 18. januar 2001-imeersuni oqaatigisimagaat suliap qaammatit 6-12-it iluanni suliarineqarnissaa aatsaat naatsorsuutigineqarsinnaasoq. Allakkani taakkunani pisortaqarfiup nalunaarutigaa suliap suliarineqarnera A-mut ilisimatitsissutigineqarumaartoq.

*Tamatum kingorna imaattunik oqaaseqaateqarsimavunga:*

*“Suliassat suliarineqartarnerat pillugu inatsimmi oqartussaasut piffissaq suliamik suliarinninnermut atortagaat pillugu aalajangersakkanik nalinginnaasunik aalajangersaasoqarsimannngilaq. Taamaattumik oqartussaasup suliamik suliarinninnermini piffissaq atugaa qaqugukkut akueri-*



neqarsinnaanngitsumik qaangiisimanersoq ataatsimut isigalugu akineqarsinnaanngilaq.

Taamaattumik piffissamik oqartussaasup suliamik suliarinninnerminut atugaanik naliliinermi piffissap suliamik suliarinninnermut atorpeqartup sivilunerpaaffigisariaqagaanik isiginninnerup saniatigut pissutsit allat aamma isiginiarneqartariaqartarput, matumani suliap suussusia, misisuinerit oqartussaasup ingerlattariaqagai, piffissaq suliap suliarineqarneranut atorpeqartartoq nalinginnaasoq kiisalu suliami ingerlaavartumik iliuuseqarnerit matumani ilanngullugit eqqarsaatigalugit.

Suliani A-mut tunngasuni Akileraartarnermut Siunnersuisoqatigiit piffissaq suliamik suliarinninnermut atugaat allakkanut qulaani taaneqartunut tulleriinneri malillugit 22. september 1998-imut aamma 18. januar 2000-imut killegarpoq.

Tamanna tunngavigalugu piffissat suliap suliarineqarneranut atorpeqartut tulleriinneri malillugit qaammatinik 30-nik aamma qaammatinik 16-inik sivilussusillit ajuusaarnartorujussuartut isigaakka.

Aamma oqaatigisimavara:

Suliap ingerlanera pillugu ilitsersuineq ingerlatsinermi ileqqorissarnissamut ilaavoq.

Pisussaaffiup taassuma imarisai erseqqinnerusut suliassat suliarineqartarnerat pillugu inatsit pillugu Inatsisileriffiup Ilitsersuusiani (1994-imeersumi) immikkoortuni 205-imi aamma 206-imi allaaserineqarsimapput:

“

205. Ingerlatsinermut oqartussaasup suliassap suussusia imaluunniit oqartussaaffimmi tassani suliassat nalinginnaasumik suliarineqartarnerat pissutigalugu suliassaq tiguneraniit piffissap sivikinnerusup iluani aalajangiivigisinnaanngikkuniuk oqartussaaffiup suliassamut tunngassuteqartoq nalunaarfigisariaqarpar suliassap qanoq inissisimaneranik aamma ajornanngippat paasissutissillugu suliassap qaqugu aalajangiivigineqarnissaa oqartussaaffimmit naatsorsuutigineqarnersoq.

206. Oqartussaaffiup aammattaq suliassamut tunngassuteqartoq ilisimatittariaqarpar suliassaq sivikinnerusumik suliarineqartussaagaluaq immikkut pissuteqartumik pisarnermit sivilunerusumik suliarineqartariaqalerpat.

”

Tamatuma kingorna Akileraartarnermut Siunnersuisoqatigiit suliap ingerlanera pillugu pisariaqarnera naapertorlugu ilisimatitsissuteqarsimannginnerat ajuusaarnartorujussuartut isigaara.

Kiisalu Akileraartarnermut Siunnersuisoqatigiit piffissap suliamik suliarinninnermut atugaata suli sivilsorsarneqarnera ajuusaarnartutut isigaara. Suliame siusinnerusukkut suliarisimasanni Akileraartarnermut Siunnersuisoqatigiit sulianik suliarinninnerannut “ajornartorsiutit kinguaattoorutaasut” pilernissaat pinngitsoortinniarlugu Akileraartarnermut Siunnersuisoqatigiit pisariaqarneratut amerlatigisoriarlutik ataatsimiitarnissaat isumaliutersuutigineqassasoq inassutigaa.

Aammattaq siusinnerusukkut oqaatigaara isumaqartunga siunnersuisoqatigiit naammattunik amerlatigisoriarlutik ataatsimiittanngissinnaan-



ngitsut, siunnersuisoqatigiit ataatsimiigiaqquneqarnerannut aningaasartuutaasussat kisiisa innersuussutigalugit, tassami taamaattoqarsimappat Akileraartarnermut Siunnersuisoqatigiit aningaasaliissutinik siunertamut naammattunik qinnuteqartariaqassammata.

Taamaattumik suli isumaqarpunga

-Akileraartarnermut Siunnersuisoqatigiit aningaasaliiffigineqarnissamik pisariaqartitsinerannik ingerlaavartumik nalilersuissallutik Naalakkersuisut pisussaaffeqartut, aamma

- Naalakkersuisut aningaasaliissutinut sinaakkusiussat iluanni suliap pisariaqanngitsumik kinguarsarnagit sularineqarnissaannik innuttaasut inatsisit malillugit piumasarisat eqqortikkumallugit tulleriiaarinissaminut pisussaaffeqartut.

Tamatuma kingorna imaattut oqaatigisimavakka:

Aningaasarsianit akileraarutit pillugit inatsimmi § 59, imm. 1-imi, tak. §§-it 56 aamma 57, aalajangersarneqarpoq eqqartuussivikkoortumik misiliisoqartinnagu Akileraartarnermut Siunnersuisoqatigiinnut naammagittaalliornissamut periarfissap marloriarluni atorineqarsimanissaa pinngitsoorani piumasaqaataasoq.

Isumaqarpunga suliap eqqartuussivikkoortumik misilinneqannginnerani oqartussaasumi ataasiusumi marloriarluni sularineqarnissaa oqartussaasup piffissamik suliap sularineqarneranut atugaanik sivitsorsaaqaataasinnaasoq.

Akileraartarnermi Pisortaqarfik qinnuigaara oqaaseqaatika sunik iliuuseqarnissamut pissutissaqalersitsinersut uannut nalunaarutigeqqullugu.

A-p naammagittaalliuutaanut atatillugu annertunerusumik iliuuseqaq-qissanngilanga.

Allakkatigut allatigut allakkallu uku assilinerisigut A suliamik paasininnera pillugu ilisimatippara.

Oqaaseqaatigisakka allat:

Suliap A-mut tunngasup sularineranut atatillugu aningaasarsianut akileraarutit pillugit inatsimmi § 59 amigaateqartoq paasivara, taassumalu Inatsisartunut Naalakkersuisunullu Inatsisartut Ombudsmandiat pillugu Inatsisartut inatsisaanni § 11 malillugu nalunaarutiginnissaa pisussaaffigaara.

Taamaallutik § 59, imm. 2-p kinguneraa Naalakkersuisut imm. 1-imi piumasaqaataasut assingi tunngavigalugit Akileraartarnermut Siunnersuisoqatigiit § 56, imm. 3, 5 aamma 6, § 57, imm. 2 aamma § 66, imm. 2 malillugit aalajangigaa Kalaallit Nunaata Eqqartuussivianut suliassanngortitsivissatut siulliusumut suliassanngortissinnaagaat.

Tulliuttuni §§-inut 55-59-mut oqaaseqaatit issuarneqarneranni ersertut tamanna paatsoortitsinnaavoq, tassami akileraartussaataasoq kisimi tassaammat oqartussaasumut suliamik sularinnissimasumut suliass-



*sanngortitseqqittussaataaneq pillugu malittarisassani pineqartunut ilaasoq:*

“...  
 ...

*Skatterådip aappassaaneerluni suliarinninnermini aalajangersimasai akileraartussaataasumit eqqartuussisunut suliaassanngortinneqarsinnaapput Kalaallit Nunaanni landsretti suliarinnittussatut aallarnerfigalugu. Landsstyrip skatterådip siullermik aappasaanillu suliarinninnermini aalajangersimasai eqqartuussisunut suliaassanngortissinnaavai Kalaallit Nunaata landsrettia suliarinneqqaartussatut aallarnerfigalugu”.*

Akileraartarnermut Siunnersuisoqatigiinnut oqaaseqaatigisama assilera-  
 nik A, Akileraartarnermi Pisortaqarfik, Aningaasaqarnermut Naalakkersui-  
 soq, Inatsisartut Inatsisit Atortinneqarnerannut Ataatsimiititaliaat Naalak-  
 kersuisullu Allattoqarfiat paasissutississimavakka.

Inatsisit Atortinneqarnerannut Ataatsimiititaliap Aningaasaqarnermut  
 Naalakkersuisumut allagaasa assilinerannik 7. maj 2001-imi tigusaqar-  
 punga. Inatsisit Atortinneqarnerannut Ataatsimiititaliaq ilaatigut ima allap-  
 poq:

“Inatsisartut Inatsisit Atortinneqarnerannut Ataatsimiititaliaata Ombudsmandip  
 nalunaarutiginninnera tunngavigalugu Aningaasaqarnermut Naalakkersuisoq matu-  
 minnga nalileeqqullugu qinnuigissavaa, suliani akileraartarnermut tunngasuni eq-  
 qartuussisunut suliaassanngortitsisinnaatitaanerup allanngortinnissaa siunertarisamut  
 naleqquttuujumaarnersoq.

Aammattaaq Inatsisartut Inatsisit Atortinneqarnerannut Ataatsimiititaliaata Naa-  
 lakkersuisunut ilaasortaq matuminnga nalileeqqullugu qinnuigissavaa, taamatut al-  
 lannguneq imminnermini Akileraartarnermut Siunnersuisoqatigiit sulianik suliaqar-  
 nerminni piffissamik atuinerata akuerineqarsinnaasumik nalleqqatigiiffegalersillugu  
 appartinnissaanut naammakkumaarnersoq imaluunniit Akileraartarnermut Siun-  
 nersuisoqatigiit amerlanerusunik sulisussaqaartinneqartariaqassanersut.

Kiisalu Inatsisit Atortinneqarnerannut Ataatsimiititaliap Naalakkersuisunut ilaa-  
 sortaq matuminnga ilisimatitsissuteqaqqullugu qinnuigissavaa, Ombudsmandip ani-  
 ngaasarsianit akileraarutit pillugit inatsimmi § 59, imm. 2, pillugu oqaaserisaasa  
 aalajangersakkamik pineqartumik allanngortitsiniarnissamut Naalakkersuisunut i-  
 laasortaq pissutissaqalersinneraat, taamaassappallu taamatut allannguisoqarnissaa  
 qaqugu ilimagineqarsinnaajumaarnersoq.” (Atorfeqarfimmi nutsigaavoq.)

Akileraartarnermi Pisortaqarfiup 15. maj 2001-imi ima akissuteqarfigaa-  
 nga:

“Allakkatigut 23. april 2001-imi ullulernerqartutigut Inatsisartut Ombudsmandia-  
 ta Akileraartarnermi Pisortaqarfik noqqaaffigaa, Ombudsmandip suliaq qulaani taa-  
 neqartoq pillugu oqaaseqaatai iliuseqarnissamut qanoq pissutissaqartitsinerat Om-  
 budsmandimut nalunaarutigeqqullugu.

Taamaalioqquneqarneq naapertorlugu Ombudsmandimut nalunaarutigineqas-  
 saaq, Inatsisartut Inatsisit Atortinneqarnerannut Ataatsimiititaliaata Aningaasaqar-  
 nermut Naalakkersuisoq, Josef Motzfeldt, allakkatigut qulaani pineqartut Ombuds-  
 mandip oqaaseqaatai pillugit nalileeqqullugu qinnuigisimammagu Akileraartarner-  
 mut Pisortaqarfiup Naalakkersuisup Inatsisartut Inatsisit Atortinneqarnerannut A-  
 taatsimiititaliaannut allagai 10. maj 2001-imeersut tunngaviliuppai, allakkallu assili-  
 neri ilanngullugit nassiunneqarput.







naammagittaalliortarfeqarnissaq (nunamut tamarmut akileraarutit pillugit eqqartuussivik).

Marloriarluni suliarinnittarnermik malittarisassaq aammattaaq akileraartartup soqutigisaanik pitsaanerpaamik isumaginninnissamik qulakkeerisuuvoq, tassami akileraartartup taamaalilluni suliassaatini aappassaaneerlugu misilitsissinnaalermagu suliassaatimi eqqartuussivik aqutigalugu suliassiissutiginnissaanut akissaqassanerluni eqqarsaatiginagu. Akileraartarneq pillugu Siunnersuisoqatigiit paasitippaannga akileraartartut pingasuugaangata taakku tamatigungajak tamakkiisumik ilaannakor-tumilluunniit suliap aappassaaneerreqarnerani akuerineqartatut.

Akileraartarnermi suliassat eqqartuussivilersuunneqarsinnaanerit pillugu allangortitsisoqarnissaa ilumut iluaqutaassanersoq naliliivigitinnagu isumaqarpunga pisariaqartoq misissussallugu suliassat qassit Akileraartarneq pillugu Siunnersuisoqatigiinnut aappasaanik suliassanngortitaanersut. Tassunga atatillugu eqqaamasari-aqarpoq suliassat eqqartuussivimmi suliarineqartut naammagittaalliuutinit pisortatut oqartussanit suliarineqartunut naleqqiullugit sivilisunerusumik suliassarmata akileraartartumut pisortanullu oqartussaasut aningaasartuutaanerusumik. Paasinninnera naapertorlugu isumaqarpiangilaq Akileraartameq pillugu Siunnersuisoqatigiit oqilisaakkutsigit, illuatungaatigulli Akileraartarnermi Pisortaarfik eqqartuussissullu suliassanik eqqartuussissutaasussanik allaffissornikkut ingerlatsinermi naammassineqarsinnaagaluartunik nammakkorsutsigit.

Ombudsmandip § 59, imm. 2-mi allassimasut ersernerluttumik takutitsisuunerarlugu oqaaseqaatai, tassami §§ 55 - 59-imut oqaaseqaatit malitsigimmassuk akileraartartoq kisimi pinngitsoorani suliap naliliivigeqqinnissaa pillugu aalajangersak-kani pineqartoq, paatsuuineramik tunngaveqarsimassapput.

§ 59, imm. 1-mi allassimavoq, akileraartartup taamaallaat Akileraartarneq pillugu Siunnersuisoqatigiit aalajangigaat § 57, imm. 2 malillugu (imaappoq aappassaaneerinerup kingoma) Nunatta Eqqartuussivianut suliassanngortissinnaagaa, Naalakkersuisulli § 59, imm. 2 malillugu Akileraartameq pillugu Siunnersuisoqatigiit aalajangigaat § 56, imm. 3, 5 aamma 6 malillugit (imaappoq suliap siullermeernerata kingoma) § 57, imm. 2 malillugu (imaappoq aappassaaneerinerup kingorna) aamma § 66, imm. 2 malillugu (imaappoq akileraarutissat naatsorsorneri pillugit aalajangigaq, ataasiartumik) Nunatta Eqqartuussivianut suliassanngortissinnaallugit. Taamalu § 59, imm. 2-mi erseqqissumik allassimavoq Naalakkersuisut Akileraartameq pillugu Siunnersuisoqatigiit suliap siullermeernerani aalajangigaat Nunatta Eqqartuussivianut suliassanngortissinnaagaat.

Taamaattumik qularnaateqanngilaq oqaatsit "piumasaqaatit taakku assigalugit" § 57, imm. 2-mut innersuussinngimmata, innersuussillutilli aalajangiinerup Nunatta Eqqartuussivianut suliassanngortissaneramik qaammatit arfinillit pineqartup aalajangiinermik nalunaarutigineqartumik ilisimatinneqareernerata kingorna kiisalu eqqartuussisuunerup, immikkut ittumik tunngavissaqartillugu, suliassiissuteqamissaq piffissaliussaq qaangiutereeraluaraangalluunniit akuersissutiginnissinnaavaa.

Oqaatiginnissinnaavara Naalakkersuisut maannamut suli Akileraartameq pillugu Siunnersuisoqatigiit aalajangigaannik Nunatta Eqqartuussivianut ataasiinnarmilluunniit suliassanngortitsisimannngimmata, taamaattoq § 59, imm. 2-mi aalajangersagaq, ilaatigut inunnut amerlasuunut annertuumik pingaarutilinni tunngaviusumik suliassanut atorneqamissaa imaluunniit aamma suliassanut immikkut ittunik pissuteqartunut atorneqarnissaa eqqarsaataavoq. Naalakkersuisut sulianut tunngaviusumik aalajangiiffigisassanik Akileraartarneq pillugu Siunnersuisoqatigiit siullermeertumik suliannik Nunatta Eqqartuussivianut suliassanngortitsisinnannissaa pisariaqarpoq, pissutigalugu Naalakkersuisut suliap aappassaaneereerlugu suliarineqarnissaa Akileraartarneq pillugu Siunnersuisoqatigiinnut nangitsisinnannngimmassuk, aamma akileraartartup aalajangiineq Akileraartameq pillugu Siunnersuisoqatigiinnut



aappassaaneerlugu suliarineqarnissaa pillugu aalajangiinerup naammagittaaliuutiginnissaa ilimagisariaqanngimmat, suliap siullermeernerani taperserneqareersimaguni.

Tamanna tunngavigalugu § 59, imm. 2-p allanngortinnissaa pillugu siunnersuuteqalersaanngilanga, kisiannili sulianik akileraartarnermut tunngasunik eqqartuussisunut suliaasiisinnaaneq pillugu allanngortitsinissaq pitsaanerussasoq, eqqarsaatigineqarsinnaavoq § 59, imm. 2 kinguneqartitsilluni allanngortittariaqassasoq.

...”

Akileraartarnermi Pisortaqarfik 18. maj 2001-imi ima akissuteqarfigaara:

“Pisorta qarfiup akissutaa 15. maj 2001-imeersoq Aningaasaqarnermut Naalakkersuisup Inatsisartut Inatsisit Atortinneqarnerannut Ataatsimiititaliaannut akissutaanik 10. maj 2001-imeersumik ilaqartinneqartoq 16. maj 2001-imi tiguara.

Suliaq pillugu oqaaseqaatinni immikkoortup uuma qanoq paasineqarnissaa pillugu nalorninini pisorta qarfiup erseqqissumik oqaatigisimavaa:

”Isumaqarpunga suliap eqqartuussivikkoortumik misilinneqannginnerani oqartussaasumi ataasiumi marloriarluni suliarineqarnissaa oqartussaasup piffissamik suliap suliarineqarneranut atugaanik sivitsorsaaqataasinnaasoq.”

Tamatununga atatillugu oqaatigaara oqaatigisara tassaammat isiginninnernik marlunnik imminnut attuumassuteqanngitsunik takutitsisusooq:

Siullermik paasinninnera malillugu pineqartoq tassaavoq ingerlatsinermut inatsiseqartitsinermi pisortat paasissutissanik pisariaqartunik nalinginnaasumik tunngavissaqarnissaasa, aningaasarsianit akileraarutit pillugit Inatsisartut inatsisaanit saneqqunniarneqanngitsutut isikkoqartup nassatarigaa Akileraartarnermut Siunnersuisoqatigiit siunnersuisoqatigiillu allattoqarfiata suliap illersorneqarsinnaasumik paasissutissartalersorneqarnissaanut pisussaaffeqarnerat – aamma suliani ajornakusooruni – Akileraartarnermut Siunnersuisoqatigiit suliami siullermeertumik aalajangiinginneranni.

Akileraarusiisartutut oqartussaasup inatsisit malillugit tusarniaasussaataanerata saniatigut tamatuma pingaartumik kinguneraa, tak. Inatsisartut inatsisaanni § 56, imm. 5, suliap Akileraartarnermut Siunnersuisoqatigiinni siullermeertumik suliarineqarneranut atatillugu pineqartoq suliami illua'tungiusutut isumaanik tusarniaavigineqassasoq, suliaasat suliarineqartarnerat pillugu inatsimmi malittarisassat naapertorlugit, taamatuttaarlu akileraartartoq oqaasiinnartigut isumaqatigiinniuteqarnissaminut periarfissaqassalluni, tak. Inatsisartut inatsisaanni § 56, imm. 3.

Taamaattumik isumaqarpunga Akileraartarnermut Siunnersuisoqatigiinni pingitsoorani marloriarluni suliarinnineq suliap paasissutissartalersorneqarnissaanik tunngavilersorneqarsinnaasariaqanngitsooq.

Naalakkersuisunut ilaasortap Inatsisartut Inatsisit Atortinneqarnerannut Ataatsimiititaliaannut oqaatigisimasaa naliliiffigisinnaanngilara, tassalu akileraartartut pingasuugaangata ataatsip suliap aappassaaneerlugu suliarineqarnerani tamakkerlugu ilaannakortumilluunniit akuersarneqartarnera suliap siullermeerluni suliarineqarnerani naammattumik paasissutissartalersorneqarsimannginneranik, paasissutissanik nutaanik pissarsisoqarsimaneranik imaluunniit Akileraartaarnermut Siunnersuisoqatigiit naliliinerminnik allanngortitsinerannik pissuteqartartoq.

Siulleq atuussimappat tamanna aqutsinikkut allaffissornermi kukkuneruvoq, Akileraartarnermut Siunnersuisoqatigiit ingerlatsinermut inatsiseqartitsinermi malittarisassat nalinginnaasut malillugit pisorta qarfik sinnerlugu aqqissallugu pisussaaffigisaat, taamaattumillu tamanna suliap inatsisit malillugit suliareqqinneqarnissaanik piunasaqarnermut tunngavilersuutigineqarsinnaanngilaq.



Pisut aappaanni akileraartartup, inatsisit malillugit marloriarluni suliarinninnissamik malittarisassaq apeqqutaatinnagu, suliap Akileraartarnermut Siunnersuisoqatigiinni suliareqqinneqarnissaa aallaavittut piumasaqaatigisinnaavaa.

Pisut pingajuanni akileraartartup suliamik pinngitsoorani suliarinneqqitsitsinissaa piumasarissallugu naleqquttuusorinangilaq, tassami Akileraartarnermut Siunnersuisoqatigiit paasinninnerminnik akileraartartumut iluaqutissiisumik allanngortitsinerat pissutigalugu Akileraartarnermut Siunnersuisoqatigiit sulianik aalajangiivigineqareersimasunik suliarinneqqilernissaminnut periarfissaat Inatsisartut inatsisaanni § 56, imm. 6-imi aalajangersarneqareersimammat, taamatuttaarlu Akileraartarnermut Siunnersuisoqatigiit suliamik suliarinneqqitsitsinikkut suliamik paasinninnerminnik allanngortitsinissaat ilimagissallugu pissutissaqarnersoq naliliiffigissallugu akileraartartoq amerlanertigut mattunneqarsimasartussaalluni.

Aappaattut oqaaseqaatinni immikkoortoq Akileraartarnermi Pisortaqarfiup nalornissutigalugu oqaatigisimasaa inatsisitigut innarlitsaalineqarnissaaq pillugu nalilii-nermik tunngaveqarpoq.

Taamaattumik Akileraartarnermi Siunnersuisoqatigiit (pinngitsoorani) marloriarluni suliarinninnerisa akileraartartup soqutigisaanik pitsaanerpaamik qulakkeerininneruneranik Naalakkersuisunut ilaasortap Inatsisartut Inatsisit Atortinneqarnerannut Ataatsimiititaliaannut paasissutissiissutaa oqaaseqaateqarfigissallugu immikkut pissutissaqartoq isumaqarpunga.

Siullermik pisortaqarfiup Inatsisit Atortinneqarnerannut Ataatsimiititaliamut paasissutissiissutaa maluginiarpara, tassalu Akileraartarnermut Siunnersuisoqatigiit aalajangigaasa pinngitsooratik suliareqqinneqartarnissaaq pillugu malittarisassamat pissutaanerpaasoq tassaasoq Landsrådet kingusinnerusukkullu Inatsisartut akileraartarnermi immikkut naammagittaalliuuteqartarfimmik, Kalaallit Nunaanni kommuninut akileraarutit pillugit inatsimmi nr. 412-imi, 13. juni 1973-imeersumi § 51, imm. 1 malillugu imatut ilaasortalersugaasussamik pilersitsisoqarnissaanik kissaateqannginnerat:

”1) Retspræsidentti imaluunniit landsskatterettimi retsformandi siulittaasutut,

2) ilaasortat marluk Kalaallit Nunaannut ministerip ukiuni 6-imi atasussanngorlugit qinigai, aammalu

3) akileraarusiisartut qullersaasa akornannit ilaasortanngortitat sisamat.

Imm. 2. Suliassat ataasiakkaat suliarineqarnerini ilaasortat qanoq katiterneqarnissaaq retspræsidentip aalajangertassavaa. Akileraarusiisartut qullersaannit ilaasortanngortitat akornanni annerpaamik marluk suliassap pineqartup siusinnerusukkut pisortanit suliarineqarnerani ilaasimassapput.”

Taamaattumik aqqissuussineq inatsimmi allaaserineqarsimasooq taanna tassavoq aqqissuussinnermut, suliap aqutsinermi allaffissornikkut naammagittaalliuutigineqarsinnaatitaanerani siunertaqartumut, takussutissaasoq.

Aqutsinermi allaffissornikkut naammagittaalliornissamat periarfissaq innuttaasut inatsisitigut immikkut innarlitsaalineqarnerattut isigineqarajuttarpoq, tassami taamaaliornikkut ingerlatsiviup aalajangiineranik oqartussani imminnut attuumassuteqanngitsuni arlalinni misiliititsinissaminnut innuttaasut periarfissaat qulakkeerneqarmat.

Kisianni aningaasarsianit akileraarutit pillugit inatsisikkut pinngitsoorani suliarinneqqitsinissamik aqqissuussineq aalajangersarneqartoq innuttaasut inatsisitigut innarlitsaalineqarnissaaq inngilaq, tassami suliaq oqartussaasunit imminnut attuumassuteqanngitsunit marlunnit suliarineqarneraq ajormat, oqartussaasumilli ataasiusumit suliarineqartarluni.

Taamaattumik suliap arlaleriarluni suliarineqarnissaaq pillugu malittarisassat inatsisitigut innarlitsaalineqarnissamat sunniutaat paasinninnera malillugu tasaaner-



paavoq suliap oqartussasunit imminnut attuumassuteqanngitsunit arlalinnit suliarineqarnera.

Aammattaaq ingerlatsiviup aalajangigaanik innuttaasut eqqartuussivikkoortumik misiliisitsinissamut periarfissaqarnerat inatsisitigut annertuumik innarlitsaaliineruvoq. Inatsimmi Tunngaviusumi § 63, imm. 1-imik malinniinnangitsoq, taannami malillugu eqqartuussiviit pisinnaatitaammata naalagaaffimmi oqartussaasut killissarititaat suulluunniit pillugit eqqartuussuteqarnissaminnut, aammali Inuit Pisinnaatitaaffii pillugit Europami Isumaqatigiissummi artikel 6, imm. 1-imik malinnittuuluni.

Taamaattumik inatsisiliortut pisinnaatitaaffimmik taassuminnga killiliisinnaanerannut atatillugu apeqqutit immikkut ittut qaffapput.

Isumaqarpunga Inatsimmi Tunngaviusumi § 63, imm. 1-ip nassatarigaa inatsisiliortut ileqqooreersunit periaatsinilluunniit erseqqissumik tapersorneqanngikkunik malittarisassanik ingerlatsiviit aalajangigaanik innuttaasut eqqartuussivikkoortumik misiliisitsinissaminnut pisinnaatitaaffiinik killilersuisunik aalajangersaasinnaangitsut.

Akilerartarnermut Siunnersuisoqatigiit aalangiinerisa eqqartuussivikkoortumik misilinneqarnissaannut sulianik pinngitsoorani suliarinneqqittarnissamik piumasaaqateqarnermik malittarisassaq, pingaartumik malittarisassap taassuma innuttaasut inatsisitigut illersorneqarnissaannik siunertaqarnerata erseqqarluttuunera eqqarsaatigalugu, Inatsimmi Tunngaviusumi aalajangersakkamut taaneqartumut sannilliullugu naliliivigineqartariaqarpoq.

Inuit Pisinnaatitaaffii pillugit Europamiut Isumaqatigiissutaanni artikel 6, imm. 1-imi aalajangersarneqarpoq kinaluunniit piffissaliunneqartup naapertuuttumik siviussuseqartup iluani eqqartuussivimmit arlaannaannulluunniit attuumassuteqanngitsumit arlaannaannullu illersuisuunngitsumit naapertuilluartumik tamanullu ammasumik eqqartuussisoqarnissaanut pisinnaatitaaffeqartoq, eqqartuussivillu taanna inatsisikkut pilersinneqarsimasuussasoq, ilaatigut innuttaasup pineqartup pisinnaatitaaffii pisussaaffiiluunniit pillugit aalangiisoqassatillugu.

Innuttaasut eqqartuussivikkoortumik misiliisitsinissaminnut pisinnaatitaaffiinik kinguarsaaneq pillugu aalajangersakkat aalajangersakkamut taaneqartumut kingulermut naapertuuttuugunangillat.

Matumani Akilerartarnermi Pisorta qarfimmu malugeqquara Inuit Pisinnaatitaaffii pillugit Europamiut Isumaqatigiissutaat pillugit inatsisip nr. 285-ip, 29. april 1992-imeersup Kalaallit Nunaannut atortuulersinneqarnissaa Inatsisartut massakkut isumaliutersuutigimmassuk. Tamanna Inatsisartut aalajangerpassuk isumaqatigiissut taanna Kalaallit Nunaanni inatsisitut inissisimalissaaq, taannalu malillugu Inuit Pisinnaatitaaffii pillugit Europamiut Isumaqatigiissutaat pillugu inatsisip atortuulersinneqarneratigut Inatsisartut inatsisaanni § 59, imm. 2 atorunnaarsinneqarsimanersoq apeqqutigineqarsinnaalissaaq.

Akilerartarnermi Pisorta qarfiup apeqqutaanut oqaaseqaatima saniatigut malugaara Akilerartarnermi Pisorta qarfik Inatsisartut Inatsisit Atortinneqarnerannut Ataatsimiititaliaannut oqarsimasoq aningaasarsianit akilerarutit pillugit inatsimmi § 57, imm. 2-mik paasinninneq pillugu oqaaseqaatika kukkusuusut.

Tamatumunnga atatillugu oqaatigaara pisorta qarfiup malittarisassamik paasininneranut isumaqataagaluartunga, kisiannili aalangiusersimasariaqarlugu aalajangersagaq massakkut ilusilersugaanermisut iluseqartilluni paasinninnermik nassuianiarnermi nalornilersitsisinnaasoq.

Inatsisartut Inatsisit Atortinneqarnerannut Ataatsimiititaliaat allakkat uku assilinerisigut ilisimatippara, matumalu kingorna malittarisassat atuuttut allangortinneqarnissaannik pisariaqartitsineq pillugu apeqqummut pisorta qarfiup isummernissaa sulii utaqqimaarpara.”



Akilerartarnermi Pisortaqarfiup 25. maj 2001-imi ima akissuteqarfigaanga:

”...

Tamanna pillugu oqaatigineqassaaq nunat tamalaat akornanni akilerartarnermut inatsiseqarnermi takornartaanngimmat arlalinnik pisortatigoortunik naammagittaalliorfissaqartarnek, taakkunani innuttaasup naammagittaalliuutaa isummerfigineqartarluni, suliaq innuttaasumit eqqartuussisunut suliassanngortinneqarsinnaatinnagu. Assersuutigalugu danskit akilerartarnek pillugu inatsisaanni atuuppoq suliap eqqartuussisutigut misilitsinnissaanut tunngaviussasooq innuttaasup pisortatigoortunik naammagittaalliuuteqarnissamik atueqqaarsimanissaa, imaappoq akileraarutit pillugit naammagittaalliuuteqartarfik aamma nunamut tamarmut akileraarutit pillugit eqqartuussivik.

Tamatununga malitsigitillugu Kalaallit Nunaanut immikkut ittumik naammagittalliuuteqartarfimmik, naak kommunimut akilerartarnek pillugu Kalaallit Nunaannut inatsit nr. 412, 13. juni 1973-imeersoq taamaaliornissamut periarfissiigaluartoq, pilersitsisoqannginnera, taarsiulluguli Akilerartarnermi Siunnersuisoqatigiinni suliat aappassaaneerlugit suliarineqartarnissaannik aalajangersumik atulersitsinissamik aalajangernek minnerpaamilluunniit innuttaasup Akilerartarnermi Siunnersuisoqatigiit aalajangiannaannik eqqartuussisunut suliassiisinnaanerani killiliini- arnermik siunertaqanngilaq, tamannalu Akilerartarnermi Pisortaqarfiup isumaa malillugu kommunimut akilerartarnek pillugu Kalaallit Nunaannut inatsisip allanngortinnissaa pillugu inatsimmi nr. 625-mi, 22. december 1976-imeersumi § 50a-mut oqaaseqaatini erseqqissumik allassimavoq, imatullu allassimasoqarpoq:

”Nuna tamakkerlugu akilerartarnissap eqqunneqarnissaa pillugu malittarisassat saniatigut siunnersuut naammagittaalliuutit aalajangersimasumik aappassaaneerlugit Kalaallit Nunaannut Akilerartarnermi Siunnersuisoqatigiinni suliarineqartarnissaannik imaqarpoq, suliassat pinartut peqqissaartumik sukumiisumillu suliarineqartarnissaasa periarfissinneqarnissaat siunertaralugu. Tamanna Landsrådit inatsimmi §§ 51-mit 56-mut pineqartutut naammagittaalliuuteqartarfiup pilersinnissaannik suli kissaateqarsimannginneranut naleqqiullugu kissaatiginarnerujussuuvoq, tassa aat- saat 1976-imi ukiakkut akileraarutit naligiissinneranni takuneqarsinnaassamat naammagittaalliuutit qanoq amerlatigisut naatsorsuutigineqarsinnaassasut.

Aalajangersakkap Akilerartarnermi Siunnersuisoqatigiinni aappassaaneerisarnissaaq atortuulersippaa. Aaqqissuussinermi Københavni Frederiksbergimilu akileraarutit pillugit naammagittaalliuutinik suliassat suliarineqartarneranni maleruagassat malinneqarput.

Nalunangilaq naammagittaalliuutit ikigisassaannigitsut naliliivigineqarnissaat tunngavissarissaarnerulissasut. Tamanna immikkut naammagittaalliuuteqartarfiup atulinnginnerani pingaaruteqartussaavoq.”

Akilerartarnermi Pisortaqarfiup isumaa malillugu oqaaseqaatini siornatungaani taaneqartuni erseqqissumik allassimavoq, Akilerartarnermi Siunnersuisoqatigiit naammagittaalliuutinik pinngitsooratik aappassaaneerisarnissaannut tunngatillugu aalajangersagaq minnerpaamilluunniit innuttaasut Akilerartarnermi Siunnersuisoqatigiit aalajangiinerinik eqqartuussisunut suliassiisuteqarsinnaanerani killiliivigini- arneqanngitsoq, taamaallaalli pineqartoq tassaalluni naammagittaalliuuteqartarfin- nut taarsiullugu qinigassaq alla.

Tamanna tunngavigalugu Akilerartarnermi Pisortaqarfik isumaqarpoq isertitat akileraaruserneqartussaanerani pillugu Inatsisartut inatsisaanni § 59, imm. 1-mi aalajangersagaq Inatsimmi tunngaviusumi § 63, imm. 1-mut, tassa eqqartuussiviit nunami oqartussaasut killissaat pillugit apeqqutit sugaluartut eqqartuussutikkut aalajangiivigisinnaanerannut pisinnaatitaanerani imaluunniit Europami nunat tama-



laat akornanni inuit pisinnaatitaaffii pillugit isumaqatigiissutaanni isumaqatigiissutip 6-ip, imm. 1-annut, tassa kinaluunniit pinerluuteqarnerup pineraniit sapinngisamik piffissap sivikitsup ingerlanerani eqqartuussivimmi arlaannaannulluunniit attaveqaranilu attuumassuteqanngitsumi, inatsisit naapertorlugit pilersinneqartumi inuup pineqartup innuttaasutut pisinnaatitaaffii pisussaaffiilu pillugit akerliinnerup aalajangiiffigineqassatillugu imaluunniit inuup pineqartup pinerluuteqarsimasutut unnerluutigineqarneranut tunngatillugu naapertuilluartumik tamanullu ammasumik killisiorneqarnissamut pisinnaatitaanerannut akerliunngitsoq. Europami nunat tamalaat akornanni inuit pisinnaatitaaffii pillugit isumaqatigiissutini isumaqatigiissummi 6-imi, imm. 1 eqqarsaatigalugu Akileraartarnermi Pisortaqarfik oqartariaqarpoq pisortaqarfiup allassimasunit taamaallaat tunngavigisimammagu Europami naalagaaffiit tamalaat akornanni inuit pisinnaatitaaffii pillugit isumaqatigiissut, Peer Lorentzenimit, Lars Adam Rehofimit aarnma Thyge Trierimit oqaaseqaatalik 1994-imi Jurist- og Økonomforbundimit allakkat pingaarutillit ilaatillugit saqqummiunneqartoq. Taamaattumik Akileraartarnermi Pisortaqarfiup tusarusullugu kissaatigaa Ombudsmandi Europami naalagaaffiit tamalaat akornanni inuit pisinnaatitaaffii pillugit isumaqatigiissutini isumaqatigiissutip 6-ip immikkoortuanik 1-imik paasinninnissamut atatillugu allassimaffinnik allanik eqqartuussisarnermilu tunngaviusunik allanik ilisimasaqarnersoq.

Ombudsmandip pisortat ingerlatsinerat pillugu inatsisip pingaarnertut tunngavia pillugu oqaaseqaataanut tassunga ilanngullugit suliamut tunngatillugu uppersarsarsuisarneq pillugu malittarisassat, ingerlatsiviup aalajangiinernik kukkusunik iluarsiinissamut pisussaanageranut kiisalu innuttaasup suliamik imminut tunngasumik suliarititseqqissinnaanageranut tunngatillugu oqaatigineqassaaq, Akileraartarnermi Pisortaqarfiup Ombudsmandip paasinninneranut isumaqataalluinnarmat, taamaattoq Akileraartarnermi Pisortaqarfiup paasinninnera malillugu inatsisiliortup pisortatigoortumik naammagittaalliuuteqartarfimmut pineqartumut tunngatillugu naammagittaalliuuteqamissamut killissat aalajangersaanissaat akornutissaqarani.

Kiisalu Akileraartarnermut Pisortaqarfiup oqaatigissavaa, Ombudsmandip Akileraartarnermi Pisortaqarfiup isertitanit akileraartussaataaneq pillugu Inatsisartut inatsisaanni § 59, imm. 2-mik paasinninneranut isumaqataanera pisortaqarfiup tusaatissatut tigummagu. Innuttaasut aamma Naalakkersuisut Akileraartarnermi Siunnersuisoqatigiit aalajangigaannik eqqartuussisunut suliassiissuteqarsinnaanerit pillugu malittarisassat allannguutissaattut siunnersuutit saqqummiunnissaat Naalakkersuisut kissaatigineeraat paasinarsinissaata tungaanut Akileraartarnermi Pisortaqarfik aalajangerpoq isertitanit akileraartussaataaneq pillugu Inatsisartut inatsisaanni § 59, imm. 2-p qanoq paasinissaanut ilitsersuummik saqqummiiniarluni, taamaalilluni Ombudsmandip isertitanit akileraartussaataaneq pillugu Inatsisartut inatsisaanni § 59, imm. 2-mi allassimasunik paatsuunganarsinnaaneraanera peeqqullugu.

Naggataagut oqaatigineqassaaq, Ombudsmandip allagaani qaammatip matuma 18-ianeersuni titarnertaat kingulliit sisamaanni pingajuannilu "§ 59, imm. 2"-mut aamma § 57, imm. 2"-mut innersuussutaasut imaattussaagunarmata "§ 59, imm. 1" aamma " § 59, imm. 2"

Akileraartarnermi Pisortaqarfiup Naalakkersuisup allakkatigut qaammatip matuma 10-aneersuni apeqqutaa akereerpagu Inatsisartut inatsiseqarnermut Ataatsimii-titaliaata - Ombudsmandillu apeqqutaat akineqarumaarput.

..."

Aningaasarsianit akileraarutit pillugit Inatsisartut inatsisaanni § 59, imm. 2-p qanoq paasineqarnissaanik Akileraartarnermi Pisortaqarfiup ilitsersuutaa ima oqaasertaqarpoq:

"Akileraartarnermi Pisortaqarfimmit nalunaarut



Aningaasarsianit akileraarutit pillugit Inatsisartut inatsisaanni § 59, imm. 2-p qanoq paasineqarnissaa pillugu.

Aningaasarsianit akileraarutit pillugit Inatsisartut inatsisaanni § 59 ima oqaasertaqarpoq:

"Skatterådip § 57, imm. 2 malillugu aalajangiinera akileraartussaaitamit Kalaallit Nunaata landsret-ianut suliarinnittussamut siulliusumut suliassiissutigisinnaavaa qaammatit arfinillit qaangiutsinnagit pineqartup aalajangiinermik tamatuminnga nalunaarfigineqarneraniit. Immikkut pissutissaqartillugu landsdommerip suliassiineq pisinnaatissinnaavaa taamaaliornissamut piffissarititaasoq akimorneqarsimagaluarpalluunniit. Suliassiissutigineqartut tassaapput Naalakkersuisut.

Imm. 2. Naalakkersuisut aalajangersakkatigut imm. 1-imi piunasaasut malillugit Skatterådip § 56, imm. 3, 5 aamma 6, § 57, imm. 2 aamma § 66, imm. 2 malillugit aalajangiineri Kalaallit Nunaata landsret-ianut suliarinnittussamut siullermut suliassiissutigisinnaavaat. Suliassiissutigineqartoq tassaassaaq akileraartussaaitaq. "

Aningaasarsianit akileraarutit pillugit Inatsisartut inatsisaanni § 59, imm. 2-p maannakkutut oqaasertaasa qanoq nassuiarneqarnissaat nalornilersitsisinaanerarlugu Inatsisartut Ombudsmandiata Akileraartarmermi Pisortaqarfik nalunaarfigisimammagu, Akileraartarmermi Pisortaqarfup erseqqissassavaa, § 56, imm. 3, 5 aamma 6, § 57, imm. 2 aamma § 66, imm. 2 malillugit Skatterådip aalajangiineri Naalakkersuisut, aalajangiinermik pineqartumik Naalakkersuisut ilisimatinneqarnerminniit qaammatit arfinillit qaangiutsinnagit Kalaallit Nunaata landsret-ianut, siullertut suliarinnittussamut suliassiissutigisinnaagaat, kiisalu piffissaliussaq qaangerneqarsimagaluarpalluunniit immikkut pissutissaqartoqartillugu suliassiinissaq landsdommerip akuersissutigisinnaagaa.

Nuuk, ulloq 28. maj 2001

...

Tamatuma kingornagut suliaq unitsikkallarpara misissuinerup, naalakkersuisunut ilaasortap Akileraartarnermut Siunnersuisoqatigiinnut suliareqqullugu qinnutigisimasaata inernissaata tungaanut.

Akileraartarmermi Pisortaqarfik akissuteqaqqullugu 17. august 2001-imi nukingisaarpara.

Akileraartarmermi Pisortaqarfik akissuteqaqqullugu 2001-imi oktobarip aallaqqaataani nukingisaaqqippara.

Misissuinerup, naalakkersuisunut ilaasortap Akileraartarnermut Siunnersuisoqatigiinnut suliareqqusimasaata inerneranik 2001-imi novembarip aallaqqaataani suli paasissutissinneqannginnama, Akileraartarmermi Pisortaqarfiup akissuteqarnissaa suli ataasiarlunga nukingisaarutigaa.

Aningaasaqarnermut Naalakkersuisup 12. november 2001-imi ima akissuteqarfigaanga:

"Ombudsmandimut paasissutissiissutitut Aningaasaqarnermut Naalakkersuisup Inatsisartut Inatsisit Atortinneqarnerannut Ataatsimiititaliaannut allagaasa 12. novemberimeersut assilineri allakkianik 2-nik ilanngussiffigisat nassiunneqarput."

Naalakkersuisunut ilaasortap Inatsisit Atortinneqarnerannut Ataatsimiititaliamut allagai ima oqaasertaqarput:

"Inatsisartut Inatsiseqarnermut Ataatsimiititaliaannut allakkanni 10. maj 2001-imeersuni neriorsuutigisattut Skatterådip naammagittaalliutit 1. januar 1998-imit 7. november 2001 tikillugu takkussortut kiisalu aalajangiivigineqartut amerlassusii pillugit kisitsisitigut takussutissiorsimapput, matumani suliata taakku suliarineqartarnerannut agguaqatigiissitsinikkut piffissaq atorineqartartoq kiisalu suliata taama sivisutigisumik suliarineqartarnerannut pissutaasut ilanngullugit eqqarsaatigalugit.



Kisitsisitigut takussutissiat il.il. saqqummiunneqartut tunngavigalugit ilorraap tungaanut ingerlasoqarneranik Akileraartarnermi Pisorta qarfiup isumaqarnera ilalersinnaavara, tassami suliat suliarineqarnerannut agguaqatigiissitsinnikkut piffissaq atorneqartartoq sivikilliarformat, taamaattoqarneralu ingerlaannassasoq naatsorsuutigineqarluni.

Akileraartarnermi siunnersortinik nutaanik marlunnik atorfinitsitsinikkut uanga Akileraartarnermilu Pisorta qarfik isumaqarpugut Skatterådip allattoq qarfiat naammagittaalliuutit il.il. takkussortut piffissap naammaginartup iluani suliarisarnissaannut naammattunik massakut sulisussaqaalersoq.

Naammagittaalliuutit ataasiakkaat piffissami akuerineqarsinnaanngitsumik sivi-suallaamik suliarineqaratik uninngasimasut nalunngilara, taamaattumillu Akileraartarnermi Pisorta qarfiimmuut aamma Skatterådip allattoq qarfiannut suliat pitsaanerusunik aqunneqarmissaat pisariaqartoq erseqqissarsimavara.

Kiisalu suliat suliarineqartarnerannut piffissap atorneqartup naammaginartumik sivisussuseqartup eqquutsinnissaa Skatterådip allattoq qarfianni ataatsimut ajornartorsiutaalissagaluarpat ingerlaannaq ilisimateqqullunga Akileraartarnermi Pisorta qarfik peqqusimavara.

Inatsiseqarnermut Ataatsimiititaliamut ilisimatitsissutitut kisitsisitigut takussutissiat Skatterådip allattoq qarfiata suliarisimasai kiisalu naammagittaalliuutit Skatterådimi suliarineqarlutik ingerlasarnerat pillugu allakkiaq ilanngullugit nassiupakka.

...

Atortussat, naalackersuisunut ilaasortap Inatsisit Atortinneqarnerannut Ataatsimiititaliamut akissummini innersuussutigisai, ima oqaasertaqarput:

”Akileraartarnermi Pisorta qarfiup allakkiaa 9. november 2001-imeersoq

Skatterådimi, Akileraartarneq pillugu Siunnersuisoqatigiinni, naammagittaalliuutitut suliat ingerlasarnerat pillugu allakkiaq.

Skatterådi isertitat akileraaruteqaataasussat kommunit akileraartarnermut oqartussaasunit qaffanneqarneri pillugit akileraartartunit naammagittaalliuutitut suliasat 300-nit amerlanerusut ukiumut tigusarpaat, taamatuttaarlu aningaasaliissutit, immikkut ittumik akuersissutit taakkulu assigisaat pillugit qinnuteqaatit amerlangaatsiartorsuit Skatterådip tigusarlugit suliarisarlugillu.

Akileraartartup isertitami akileraaruteqataasussat akileraarusiinnermi oqartussasunit qaffanneqarnerat pillugu naammagittaalliortup inatsisitigut inissisimanermi sapinngisamik piaarnerpaamik qulaajarneqarmissaa pissusissamisoortumik kissaatisarparaa, taamaattumillu naammagittaalliuutitut suliasat il.il. qaammatit 12-it iluanni Akileraartarnermi Siunnersuisoqatigiinnit aalajangiivigineqarsinnaanerat Skatterådip aamma Akileraartarnermi Pisorta qarfiup anguniagaraat.

Skatterådimum naammagittaalliuutitut suliasat il.il. piareersarneqarnerat siunnersuisoqatigiit allattoq qarfianni ingerlanneqartarpoq, taannalu massakut ataatsimik immikkoortortaqarfinni pisorta qarpoq, ataatsimik kukkunersuinnermi pisorta qarlu-ni, sisamanik akileraartarnermut siunnersorteqarluni kiisalu overassistentimik ataatsimik sulisoqarluni. Akileraartarnermut siunnersortit kingulliit marluk 1. september 2001-imi atorfinitsinneqarsimapput.

Suliasat Skatterådimi suliarineqarneranni ingerlaaseq immikkoortunut pingasunut agguataarneqarsinnaavoq. Immikkoortoq siulleq tassaavoq naammagittaalliuutitut suliasamik il.il. nalunaarsuineq. Immikkoortup aappaa tassaavoq suliasamik suliarinninnerpiaq. Immikkoortoq kingulleq Skatterådimum naammagittaalliummik oqaluuserinninnerannut tunngasuuvuq.

Naammagittaalliuut pillugu il.il. suliasami suliarineqartoq siulleq tassa nalunaarsuineq kiisalu naammagittaalliuutit tiguneqarnerata uppernarsarneqarnera.



Naammagittaalliuut tamatuma kingorna nutsigassaappat nutsigassanngortillugu nas-siunneqartarpoq. Nalunaarsuineq kisitsisitigut naatsorsueqqissaarnermut aamma a-torneqartarpoq. Suliassaq nalunaarsorneqareerpat il.il. immikkoortorta qarfimmu/suliamik ingerlatsisumut suliassap suliarineqarneranik suliarinnittussamut, suliap i-ngerlasimaneranik allaaserinnittussamut kiisalu Skatterådimit inassuteqaasiortussa-mut tunniunneqartarluni.

Suliassap suliarineqarnerpiaa najukkami pineqartumi akileraarusiisartumit oqaa-seqaatit kiisalu tamanna pisariaqarpat paasissutissat uppernarsaasersuutillu naam-magittaalliuuteqartumit taassumaluunniit sinniisaanit pissarsiariniarneqartarput. Ta-matuma kingorna suliap ingerlasimanerata allaaserineqarnera suliarineqartarpoq, taannalu ilaatigut suliassami pissusiviusunik aamma suliassa qarfimmi tassani inatsi-sitigut malittarisassanik suliamut attuumassuteqartunik periaatsimillu allaaserinnin-nermik kiisalu suliassap qanoq aalajangiivigineqarnissaa pillugu siunnersuummik imaqartarpoq.

Suliap ingerlasimaneranik allaaserinnineq nutsertariaqarpat nutseriarlugu naam-magittaalliuuteqartumut taassumaluunniit sinniisaanut nassiunneqartarpoq oqaase-qaate qarfigisassanngortillugu, tamatumalu kingorna naammagittaalliuuteqartoq taassumaluunniit sinniisaa oqaasiinnartigut isumaqatigiinniute qarfigineqartarluni. Naammagittaalliuuteqartoq oqaaseqaate qar-simappat taassuma oqaaseqaatai suliap ingerlasimane pillugu inaarutaasumik allaaserisamut ilanngunneqartarput, kiisalu Akileraartarnermut Siunnersuisoqatigiit qanoq aalajangiinissaat pillugu allattoqar-fiup siunnersuutaa aamma ilanngunneqartarluni.

Skatteråd ukiumut pingasoriarlutik ataatsimiittarput, tassalu aprilimi, septembe-rimi decemberimilu. Ullormut oqaluserisassat oqaaseqaatit alersukkat allattoqar-fiup suliarisarpai, pappiarallu pisariaqartut amerlasuunngorlugit naqitertarlugit, kii-salu naammagittaalliuuteqartut Skatterådimit nammineerlutik sassarnissaminnik kissaateqartut aggersartarlugit. Skatterådip naammagittaalliuutitut suliassaq aalaja-ngiiffigigaangassuk siunnersuisoqatigiit aalajangiinerat tunngavilersugaq pisaria-qartillugu nutserneqaqqaartussaq naammagittaalliuuteqartumut taassumalu sinni-saanut nassiunneqartarpoq.“

...

Akileraartarnermi Pisorta qarfiup allakkiaa 7. november 2001-imeersoq

Suliassat 1999-imi siusinnerusukkullu takkussimasut suliarineqarsimanninnerat pillugu allakkiaq.

1999-ip siorna

Suliassat arfinillit taakku Skatterådimit 2001-imi decemberip qaammataani ataatsimiinnermi saqqummiunneqassapput.

1999

Suliassat tallimat isumakkeerinninemut tunngasut kiisalu § 54 tunngavigalugu suliassaq ataaseq Skatterådimit 2001-imi decemberip qaammataani ataatsimiin-nermi saqqummiunneqassapput.

Suliassanit sinneruttunit 23-iusunit suliassat arfineq-marluk Skatterådip 2001-imi decemberip qaammataani ataatsimiinnerani saqqummiunneqassapput. Suliassat pi-ngasut 2001-imi decemberip qaammataani ataatsimiinnermi saqqummiunneqarnis-saat naatsorsuutigineqarpoq.

Suliassat sinneruttut katillugit 13-iusut 2002-mi aprilip qaammataani ataatsi-miinnermi saqqummiunneqarnissaat naatsorsuutigineqarpoq.

Skatterådip allattoqarfiani suliassat siusinnerusukkat taama siviisutigisumik sulia-rineqartarnerat 1999-imut uterluni ingerlatinneqarsinnaavoq, taamanikkummi siun-nersortitut atorfiit inuttaqanngitsut inuttalernerneqanngitsoormata, tassami inunnit piukkunnaateqartunit qinnuteqaatinik tigusaqartoqarsimannimmatt. Ajornartorsiut taanna massakkut qaangerneqarpoq, tassami akileraartarnermi siunnersortitut ator-



fiiit tamarmik massakkut inuttalerneqarsimmata, ukiullu tulliuuttut marluk taamatut inuttaqaannarnissaat naatsorsuutigineqarluni.

Taamaattumik allattoqarfik isumaqarpoq naammagittaalliutit tiguneqarnermi kingorna agguaqatigiissillugu qaammatit 12-it iluanni inaarlugu suliarineqarsinnaasarnissaanik anguniagaq siunissami malinneqarsinnaalissasoq.

Suliat agguaqatigiissillugu qaammatit aqqaneq-marluk ingerlaneranni suliarineqartarnerisa annertunerusumik sivikillisinneqarnissaat ajornarunarpoq, tassami pisuni arlalinni paasissutissat pisariaqartut aamma uppersaataat assigiinngitsut kii-salu inaarutaasumik piunasaqaataasut oqaasertalersorneqarnissaat naammagittaalliortumut taannalu sinniisoqarpat sinniisaanut isumagitinniarnarat ajornakusoortarmat. Taamaattumik suliat amerlanngitsut piffissami sivilunerungaatsiartumi suliarineqartartussaapput.

AKILERAARTARNERMUT SIUNNERSUIISOQATIGIIT ATAATSIMIINNERISA NR. 89-ISSAATA 07.11.2001-IMI PISUP KINGORNA KISITSISIT ATORLUGIT NASSUIAASIORNEQ

TABEL 01.

SULIAT TIGUNEQARSIMASUT, PIFFISSAMI 01.01.1998-IMIT 07.11.2001-IMUT

	1998	1999	2000	2001
Siullermeerinninnerit	124	158	138	111
Aappassaaneerinninnerit	16	15	8	12
§ 54	14	10	10	12
Kukkunersiuineq	45	9	4	1
Isumakkeerinninnerit	125	109	92	79
<b>Katillugit</b>	<b>324</b>	<b>301</b>	<b>252</b>	<b>227</b>

TABEL 02.

AKILERRAARTARNERMUT SIUNNERSUIISOQATIGIINNI SULIAT I- NARNEQARSIMASUT

	1998	1999	2000	2001	2001	2001
Ataats.nr. 79-80-81	82-84	85-87	88-89	Ilimagis.	ilimagis.	
				ataats.90	katillugit	
Siullermeerinn.	117	85	125	122	70	192
Aappassaaneer.	17	13	15	15	5	20
§ 54	15	4	25	17	14	31
Isumakkeerinn.	69	40	121	64	23	87
<b>Katillugit</b>	<b>218</b>	<b>142</b>	<b>286</b>	<b>218</b>	<b>112</b>	<b>330</b>

TABEL 03.

AKILERRAARTARNERMUT SIUNNERSUIISOQATIGIINNI SULIAT I- NARNEQ ARSIMANNGITSUT

	1998	1999	2000	2001	1 alt
Siullermeerinnin.	4	20	68	58	150
Aappassaaneerinn.	0	3	1	1	5



Isumakkeerinninn.	2	5	37	65	109
§ 54	0	1	11	12	24
<b>Katillugit</b>	<b>6</b>	<b>29</b>	<b>117</b>	<b>136</b>	<b>288</b>

TABEL 04  
PIFFISSAQ SULIANIK SULIAQARNERMUT ATORNEQARTOQ,  
SULIAT AKILERAARTANERMUT SIUNENRUSISOQATIGIIT ATAATSI-  
MIINNERANNI NR. 89-IMI, 3. – 4 OKT. 2001-IMI PISUMI, SAQQUMMIUN-  
NEQARTUT

<i>Suuss. /qaamm.</i>	0-6	7-12	13-18	19-24	>24	<i>I alt</i>
Siullermeerinn.	5	2	4	5	18	34
Aappassaaneerin.		1	1		1	3
Isumakkeerinn.		1	1	3	4	9
§ 54		1			1	2
<b>Katillugit</b>	<b>5</b>	<b>5</b>	<b>6</b>	<b>8</b>	<b>24</b>	<b>48</b>

Akilerartarnermi Pisortaqarfik 17. december 2001-imi ima akissuteqarfigaara:

”Oqaaseqaatinni 23. april 2001-imeersumi oqarpunga Akilerartarnermut Siunnersuisoqatigiit suliat A-mut tunngasut sularineqarnerannut ukiut marluk sinnerlugit atorsimammatigit ajuusaarnartorujussuartut isigigiga. Tulliullugu oqaatigaara Akilerartarnermut Siunnersuisoqatigiit suliap ingerlanera A-mut pisariaqarnera naapertorlugu ilisimatitsissutigisimanngimmassuk ajuusaarnartorujussuartut isigigiga. Kiisalu oqaatigaara Akilerartarnermut Siunnersuisoqatigiit piffissap suliamik sularinninnermut atugaata suli sivitsorsarneqarnera isorisariaqartutut isigigiga.

Inassutigaara naammagittaalliuutinik sularinnittarneq pillugu malittarisassat atuuttut allangortinnissaannut pissutissaqarnera Akilerartarnermi Pisortaqarfiup isumaliutersuutigissagaa.

Aningaasaqarnermut Naalakkersuisoq aamma Inatsisartut Inatsisit Atortinneqarnerannut ataatsimiititaliaat Akilerartarnermut Siunnersuisoqatigiinnut inassutigisara pillugu allakkat assilinerinik nassillugit ilisimatippakka.

Nalunaaruteqarnera tunngavigalugu Inatsisartut Inatsisit Atortinneqarnerannut Ataatsimiititaliaata Aningaasaqarnermut Naalakkersuisoq qinnuigaa sulariani akilerartarnermut tunngasuni eqqartuussivimmu suliassanngortitsinissamut periarfissap allangortinneqarnissaa naleqquttuunersoq naliliiffigeqqullugu. Aammattaaq Inatsisartut Inatsisit Atortinneqarnerannut Ataatsimiititaliaata Aningaasaqarnermut Naalakkersuisoq qinnuigaa taamatut allangortitsineq immiini piffissamik Akilerartarnermut Siunnersuisoqatigiit sularinik sularinninnerminnut atortagaannik akuerineqarsinnaasumik sivisussuseqartumut sivikillitsinissamut naammassanersoq, imaluunniit Akilerartarnermut Siunnersuisoqatigiit nukissanik amerlanerusunik atugassinneqartariaqarnera naliliiffigeqqullugu.

Naalakkersuisunut ilaasortap Inatsisartut Inatsisit Atortinneqarnerannut Ataatsimiititaliaq allakkatigit 10. maj 2001-imeersutigit nalunaarfigaa Akilerartarnermut Siunnersuisoqatigiit qinnuigisimallugit naammagittaalliuutit 1. januar 2000-imit ulloq manna tikillugu takkussimasut, suliat aalajangiivigineqarsimasut, matumani piffissaq agguaqatigiissitsinermi sularinik sularinninnermut atorneqartartoq, kiisalu suliat sularineqartarnerannut piffissap taama sivisutigisup atorneqartarnerannut pissutaasut ilanngullugit eqqarsaatigalugit, pillugit kisitsisitigit takussutissanik sulariaqqullugit.



Naammagittaalliutit suliarineqartut piffissap naammaginartup iluani suliarisin-naalersillugit Akileraartarnermut Siunnersuisoqatigiit nukissanik naammattunik atugassaqartinneqarnerisut, imaluunniit piffissap suliat suliarineqarnerannut atorineqartartup sivikillisinneqarnissaanut allatigut suliniuteqartoqassanersoq paasissutissat taakku aallaavigalugit Naalakkersuisunut ilaasortap Akileraartarnermi Pisortaarfik peqatigalugu naliliiffigisussaavai.

Naalakkersuisunut ilaasortap Inatsisartut Inatsisit Atortinneqarnerannut Ataatsimiititaliaannut allagaasa 12. november 2001-imeersut assilineri allakkianik marlun-nik ilaqartinneqartut 14. november 2001-imi tiguakka. Allakkiaq siulleg naammagittaalliutit Akileraartarnermut Siunnersuisoqatigiinnit suliarineqartut qanoq ingerlasarnerannut tunngasuvoq, allakkiallu aappaa suliat piffissami 1. januar 1998-imit 7. november 2001-imut takkussimasut pillugit takussutissiaalluni.

Inatsisartut Inatsisit Atortinneqarnerannut Ataatsimiititaliaannut allakkani 12. november 2001-imeersuni piffissap Akileraartarnermut Siunnersuisoqatigiit sulia-nik suliarinninnermut atortaagata ilorraap tungaanut ingerlanerani Akileraartarnermi Pisortaarfip paasinninnera Aningaasaqarnermut Naalakkersuisup ilalerpaa, tassami piffissaq suliat suliarineqarnerannut agguaqatigiissitsineri atorineqartartoq sivikilliarformat; pissutsit taamaannerat ingerlaqqittussatut naatsorsuutigineqartoq.

Suliat pillugit takussutissiami ilanngullugu nassiunneqartumi Akileraartarnermi Pisortaarfik oqarpoq piffissap suliat siulerineqartarnerannut siusinnerusukkut taama sivisutigisumik atorineqartarneranut pissutaasoq 1999-imut tutsinneqarsinnaasoq, taamanimi siunnersortitut atorfiit inuttaqanngitsut inuttalerniarneqarnerat Akileraartarnermut Siunnersuisoqatigiit iluatsitsiviginngitsoormassuk.

Tamatama kingorna Akileraartarnermi Pisortaarfip oqaatigaa akileraartarnermut siunnersuisutut atorfiit tamarmik inuttalerniarneqarnerat pisortaarfip iluatsit-sissimagaa, taamaattumillu naammagittaalliutip tiguneqarneranit suliap agguaqatigiissitsineri qaammatit 12-it iluanni inaarlugu suliarineqartarnissaanik angunia-gaasup anguneqarnissaa pisortaarfip naatsorsuutigigaa.

Oqaaseqaatikka:

Naammagittaalliortup Akileraartarnermut Siunnersuisoqatigiit aalajangiineran-nik ataatsimik agguaqatigiissillugu qaammatini aqqaneq-marlunni utaqqinissaa naammaginartuusoq Akileraartarnermi Pisortaarfik sooq isumaqarnerisooq paasissu-tissanit saqqummiunneqartunit takusinnaanngilaa, pingaartumik eqqarsaatigigaanni aningaasarsianit akileraarutit pillugit inatsimmi § 59, imm. 1, tak, §§-it 56 aamma 57, malillugu eqqartuussivikkoortumik misiliisitsisoqassappat Akileraartarnermut Siunnersuisoqatigiinnut naammagittaalliornissamat periarfissap atuuttup marloriar-luni atorineqarsimanissaa pinngitsoorani piumasaqaataasoq.

Inatsisartut Inatsisit Atortinneqarnerannut Ataatsimiititaliaata Aningaasaqarner-mut Naalakkersuisooq allakkatigut 6. maj 2001-imeersutigut qinnuigaa ilaatigut suli-ani akileraartarnermut tunngasuni eqqartuussisutigoortumik misiliisinnaanermut pe-riarfissap allangortinneqarnera naleqquttuussanersoq nalileqqullugu, kiisalu al-lannguut taanna immi piffissap Akileraartarnermut Siunnersuisoqatigiit sulianik suliarinninneranni atorineqartartup naammaginartumik sivisussuseqalersillugu sivi-killineqarnissaanut naammannerisooq, imaluunniit Akileraartarnermut Siunnersuiso-qatigiit nukissanik amerlanerusunik atugassaqartinneqartariaqarnerisut nalileeqqul-lugu.

Aningaasaqarnermut Naalakkersuisooq apeqqummi qulaani taaneqartumi qanoq naliliinersooq paasissutissanit nassiunneqartunit takusinnaanngilaa.

Kiisalu malugaara Akileraartarnermi Pisortaarfik allakkamini 25. maj 2001-i-meersuni imatut allattoq:

”... nunat tamat akileraartarneq pillugu inatsiseqartitsineranni aqutsineri allaf-fissornikkut arlalinnik naammagittaalliortarfeqarnera takornartaanngitsoq, innutta-



sullu naammagittaalliuutaa taakkunani isummerfigineqaqqaartussaasoq, suliap innuttaasumit eqqartuussivimmut suliassanngortinneqannginnerani. Assersuutigalugu qallunaat akileraartarneq pillugu inatsiseqartitsineranni atuuppoq eqqartuussivikkoortumik misiliisitsisoqassappat aqutsinermi allaffissornikkut oqartussaasumut qulliunersumut innuttaasup naammagittaalliornissamut periarfissai, tassalu akileraartarnermi naammagittaalliuuteqartarfimmut aamma akileraartarneq pillugu nuna tamakkerlugu eqqartuussivimmut, tamakkiisumik atorpeqarsimanissaat piumasqaataavoq. ..." (Atorfeqarfimmi nutsigaavoq.)

Oqaaseqaatip qallunaat akileraartarneq pillugu inatsiseqartitsinermi naammagittaalliortarneq aamma eqqartuussivikkoortumik misiliisitsineq pillugit malittarisasaannut atatillugu isiginiarnerani Akileraartarnermi Pisortaqaarfiup oqaaseqaataa paasisinnaanngilara, malittarisassallu taakku imaattunik oqaasertaqarput, tak. Inatsit pillugu nalunaarut nr. 859, 13. september 2000-imeersoq (Skattestyrelsesloven), kapitali 3. Naammagittaalliortarneq aamma eqqartuussivikkoortumik misiliisitsineq:

...

§ 21. Kommunimi akileraartarnermut oqartussaasup § 2 tunngavigalugu aalajangiineri pillugit naammagittaalliuutit akileraartarnermi naammagittaalliuuteqartarfimmut tunniunneqartassapput. Naammagittaalliuut allakkatigoortuussaaq tunngavilersugaassallunilu. Naammagittaalliuut aalajangiinerup naammagittaalliuutigineqartup tiguneranit kingusinnerpaamik qaammat ataaseq qaangiutsinnagu akileraartarnermi naammagittaalliuuteqartarfimmit tiguneqareersimassaaq, imaluunniit aalajangiineq pillugu immikkut nalunaaruteqartoqarsimanngippat, tak. § 3, imm. 4, ukiumoortumik naatsorsuinerit tiguneqarnerannit qaammat ataaseq qaangiutsinnagu. Taamaattorli umiartortoq nunat allat imartaanni umiartortuusoq eqqarsaatigalugu aalajangiinerup ullulernerqarneranit qaammatit pingasut qaangiutsinnagit.

...

Imm. 5. Naammagittaalliuut naammagittaalliuutip tiguneqarneranit qaammatit pingasut qaangiutsinnagit akileraartarnermi naammagittaalliuuteqartarfimmit aalajangiivigineqarsimanngippat aalajangiineq naammagittaalliuutigineqartoq akileraartarneq pillugu nuna tamakkerlugu eqqartuussivimmut toqqaannartumik naammagittaalliuutigineqarsinnaavoq.

...

§ 31. Inatsisini allani allamik aalajangiisoqarsimanngippat akileraartarnermut, akitsuusersuinerimut ilanngaaserinermulluunniit oqartussaasup aalajangigaa eqqartuussivinnut aatsaat suliassanngortinneqarsinnaavoq, aalajangiineq taanna suliassarqarfimmi tassani aqutsinermi allaffissornikkut naammagittaalliorfissaasumit qullerpaamit misilinneqareersimappat imaluunniit itigartitsissutigineqarsimappat. Taamaattorli eqqartuussivimmi suliap ingerlanerani apeqqutip nutaap ilanngunneqar-nissaa eqqartuussiviup akuerisinnaavaa, apeqqut taanna apeqqummut eqqartuussivikkoortumik suliarinnitsitsinissamut tunngaviusumut erseqqilluinnartumik ataqatigiinneqarpat, apeqqutillu taassuma siusinnerusukkut ilanngunneqarsimannginnera tunngavissaqartumik utoqqatsissutissaqartutut isigineqarsinnaappat, imaluunniit akuersiumannginnerup suliama illua'tungiusup pisinnaaatitaaffimminik pisunut sanilliullugu annertuallaamik annaasaqarnissaa naatsorsuutigissallugu pissutissaqarpat.

Imm. 2. Taamaattorli suliap aqutsinermi allaffissornikkut oqartussaasumut tunniunneqarneranit qaammatit arfinillit sinnerlugit ingerlasimappata suliaq eqqartuussivinnut suliassanngortinneqarsinnaavoq, naak suli aalajangiisoqarsimanngikkaluar-toq.

Imm. 3. ..." (Atorfeqarfimmi nutsigaavoq.)



Inatsisartut Inatsisit Atortinneqarnerannut Ataatsimiititaliaat Aningaasaqarnermullu Naalakkersuisoq Akileraartarnermi Pisorta qarfimmu allakkama assilinerinik paasissutississimavakka.

Ukiup nalunaarusiuunneqartup naanerani Akileraartarnermi Pisorta qarfiup akissutaanik tigusaqarsimanngilanga.

**28 – 2 Akileraarutit sinneqartoorutaannit, aappariit ataatsimut akileraarusikkat pisassaannit, pinngitsaaliinikkut akiliisitsiniarsinnaatitaanermik apeqqut.**

*A-p naammagittaalliutigaa K kommuni ukiumut 1999-imut akileraarutinit utertoortissanit tamarmiusunit uimi averusersimasami akiitsuinut immikkut ittunut ilanngaassisimammat.*

*Ombudsmandi isumaqarpoq aappariit akileraarutinit utertoortissaannit aappariit arlaata immikkut akiitsuinut matussutissanik ilanngaassisoqarsinnaanera imaluunniit allatut malersuisoqarsinnaanera pillugu apeqqut akileraarutinit utertoortissat tamakkerlutik taakkualuunniit ilaasa uiusup/nuliaasup pineqartup isertitaanut tunngatinneqarnerisa qanoq annertutigisumik uppernarsarneqarsinnaaneranunut ataqatigiissillugu isigisariaqartoq.*

*Ombudsmandi isumaqarpoq suliami matumani akileraarutinit utertoortissat tamakkerlutik A-p isertitaqarneranut tunngatinneqarsinnaasut.*

*Matuma kingornagut Ombudsmandi isumaqarpoq K kommunip inatsisitigut tunngavissaqarnani akileraarutinit utertoortissanit A-p uiata averusersimasaata meeqqamut akilersuutinut akiitsuisa appartinnissaannut ilanngaassisimanera isornartorsiortariaqartoq.*

*Ombudsmandip inassuteqaatigaa K kommunip suliaq suliareq-qissagaa.*

*Ombudsmandip immikkut allakkatigut, Ombudsmandip oqaaseqaataata assilineranik ilanngussivigineqartutigut, Akileraartarnermi Pisorta qarfik qinnuigisimavaa suliaq pisorta qarfiup qanoq iliuuseqarnissaanut pissutissaqalersitsinersoq ilisimatitseqqullugu. (J. nr. 11.64.20.8/065-00)*

A-p oqaasiinnartigut naammagittaalliutaanik 6. juni 2000-imi tigusaqarpunga. Uimi averusersimasami, B-p, akiitsuinut immikkut ittunut ukiumut 1999-imut akileraarutinit utertoortissanik (§ 50 malillugu tunniusseq) tamarmiusunik K kommunip ilanngaassisimanera A-p naammagittaalliutigaa.

Allakkatigut 6. juli 2000-imeersutigut K kommuni suliami allagaatinik atukkiusseqqullugu taamatullu naammagittaalliummut oqaaseqaatinik